

شعر عامية



غريبة وحجابية

د/ محمد شحات

اهداءات ٢٠٠٢

الأستاذ/ فاضل محمد العليم القباني
الإسكندرية

شعر بالحامية

غربة ومريّة

BIBLIOTHECA ALEXANDRINA

مكتبة الإسكندرية

طبعة ١ / ١٩٩٨ م

بِسْمِ اللَّهِ الرَّحْمَنِ الرَّحِيمِ

احسن وصديق الذراع المحمدين
الاستاذ / عبد الله عبد الصبور
يسعدني اهداء ديواني (غربة وحبابة)
اليك مع خالص مودتي واحترامي بكم

احول
د/ محمد شكري
١٩٩٨ / ٦ / ٧

نهد

٤٤١٨٤٥٨ قزل

الشعر خلني وانا مني الى العاصي،
قريب لنفسي وعيانيش جوه في دمي
يليني لحظة أمل لما اشـ تكى همي
والشعر همما أخذ قلبي ووجداني
كل اللي يكتب زجل بانله له ، يا عـــــــــمي،

د/ محمد شكري



مقدمة بقلم كاميل حنيني

رئيس جمعية أرباب السحب بالإسكندرية

- سعدت أيما سعادة، بأن أتاحت لى الأيام تقديم مجموعة شاعرنا الكبير الدكتور محمد شكرى جاد، فى حياتى الطويلة بين شعراء الفصحى والعامية فى وطننا الواسع، الكبير، العزيز، لم أصادف من هو أنقى سريرة، وأصفى نفس، وأطيب قلب من هذا الشاعر الانسان، فهو فى كل مجمع من هؤلاء، البلمس الشافى، الناجع، والمريح لكل إخوانه ومعاصريه، وكأنه يحمل فى داخله (أجزخانتة) التى يتركها. خلف ظهره لينعم بلحظات للهدوء والخيال والشعر بين زملائه الشعراء.. أجزخانه كل أدويتها من بلاسم الحب والظهر والمودة، ينثرها من حوله فى كل اتجاه.. بلا حساب.. وبالمجان إحساسا بالله، ولعاطفة الحب التى تحتويه.
- وشاعرنا الكبير فى الاصل والابتداء - شاعر فصحى مجيد، ومتميز، وأحد أعلام الشعر فى مدينة الاسكندرية، تناول قامته الشعرية قامات أفذاذ هذا الفن بها.

• وفجأة ، استرعى الانتباه ، وهو يتقدم بامكانياته وقدرته للعطاء من خلال نظم الكلمة العامية فى الزجل أو فى شعر العامية - وأن كنت لا أميل إلى مثل هذا التقسيم - فمردّ المنظومات كلها الى ينبوع واحد وهو (فن الشعر) سواء اختلفت المجرات من هذا ينبوع، وتباينت بين الفصحى، أو العامية، أو حتى اللغات الاجنبية.. هذا استدراك يتغلب على نفسى دائما فى هذا الصدد، وأعود فأقول.. استرعى انتباهنا فى لجان التحكيم لمسابقات فن الزجل التى أقيمت خلال العشر سنوات الاخيرة، ونحن ننظر الى النصوص دون وجود أسماء أصحابها، أن الفائز الاول غالبا يكون هو الدكتور محمد شكرى جاد.. ولم تكن نعرفه إلا شاعرا للفصحى.

• وقد حاول أصدقاؤه من بين شعراء الفصحى أمثال شاعرنا العظيم عبد العليم القبانى والمرحوم عبد المنعم الانصارى أن يمسكا بغنان جواده المندفَع الى العامية، ليلوونه الى سلوك طريق الفصحى وحده.. دون جدوى.. وللصديق القبانى مقولة فى هذا الصدد، يكررها عن أمير الشعراء أحمد شوقى ورأيه فى أزجال بيرم.. فيقول القبانى (انى لا أخاف على شعر الفصحى عند محمد شكرى إلا من شعر العامية عنده).

ورأى أن شعر العامية عند شاعرنا هو أنسب طريق ،
وأليق سبيل إلى روحه وطبيعته السمحة ، البسيطة ، الصادقة
، السهلة فى التعبير عن نفسه ، وأنه يجد فيها روحه
ووجدانه حقاً وصدقاً ، بدلاً من اللجوء الى الفاظ العربية
الفصحى التى قد تبعدك مفرداتها و(أعجمياتها!) ، واضطرارك
للتأمل فى معانيها لتبين مداركها .. عن التلقى المباشر ،
والوجدانى السريع للمنظومات بل وأن الشاعر يؤكد هذا فى
نشيد افتتاحيته للديوان .. حيث يقول ..

الشعر خدنى .. وانا ميّال الى العامى

قريب لنفسى .. وعاش جوّه فى دمي .. الخ

• والغريب فى الأمر ، وأنا أسطر هذه المقدمة ، وحيث
ورد اسم أمير الشعراء شوقى .. يخطر فى ذهنى دون ترتيب ،
ومع امتلائى بالتأمل الملىء فى أسلوب محمد شكرى .. أجد
أن أسلوب شكرى ، المكون من نسيج الكلمات العامية
المنتقاه فى نقاء ، ودقة ، ورهافة إحساس ، والمختلط بالالفاظ
العربية الفصيحة ، السهلة التى درج الناس على عاميتها
بينهم ، والتى تسرى فى داخلها روح الخيال والشعر .. أجد أن
هذا الاسلوب يكاد يتشابه ويتمائل تماماً مع اسلوب أحمد
شوقى نفسه ، حين كتب بالعامية أناشيده الخالده (بلبل

حيران (فى الليل لما خلى) .. الخ .

فى الليل لمّا خلى .. الأ من الشاكى

والنوح على الدوح حلى .. للصارخ الباكى

سكون ووحشه وظلمه .. وليل مالوش آخر

ونجمه راحت ونجمه .. حلفت ما تتأخر .. الخ

واذا حاولت التمثل بمقتطفات من شعر شكرى ، فكل

قصيدة من قصائد هذا الديوان تحمل هذه السمات المميزة ..

ولا تخفى عن فطنة القارئ .. كقوله مثلاً ..

آه يا زمان الأسى .. هات لى مواويلك

يمكن فى لحظة شجن قلبى يغنى لك

باسأل وكلى أسف .. تطفى قناديلك .. الخ

أو قوله :

أمرك عجيب يا زمن .. بترخص الغالى

ويهون عزيز الامل .. فى قلب أمثالى

طب بس إيه العمل .. ضيعت أمالى .. الخ

أو قوله :

عنى على الانسان .. فى عالم الانسان

دايما مع المجهول .. يجرى فى كل مكان

العمر عنده كتاب .. لكن بدون عنوان .. الخ

• هذه خاطرة فرضت نفسها على قرضا اثناء الكتابة ،
وأعود إلى الديوان وأغراضه ، واعتقد أن كل أغراض الديوان
تتدرج وتتمثل فى عنوانه (غُربه وصبابه) فكل قصيدة من
قصائده يمكن أن تحمل عنوان الديوان ذاته ، ولا تخلو واحدة
منها من صبابة العشق وشعور الغربة .. وقد كتب الله وشاء
بالغربة عن الوطن لصاحب الديوان ، فهو منذ أعوام طويلة
يكتوى بنار هذه الغربة فى (السعودية) حيث يعمل بها ..
ولأنه إنسان صاحب إحساس راقى ، وقلب مفطور على
الشوق والمحبة ، كما قدمنا فى أول هذا الكلام ، فقد ذابت
أشعاره حبا وصبابة فى وطنه وبلاده .. أنظر قصائده فى حب
مصر .. وفى حب اسكندرية - وبنت الهرم أنظر قصائده التى
كتبها عن الام (جرح الفؤاد - أحضانك يا أمى) ستحس فوراً
أنه يعنى بها أيضاً الأم الكبيرة مصر ، التى لا تغيب لحظة
عن خاطره ، انظر إحساسه الشديد بالاغتراب وبالانتماء إلى
أهله فى قصائده (أيام حبك - أضيع من الأيتام - عيد ميلاده
فى الغربة) .. بل أن قصائده الغزلية الرقيقة والتى تنوف

على إثني عشر قصيدة، كلها تعالج من طرف خفى الاحساس بلواعج الغربة، والبعد، والحنين إلى الاحباء وكل الناس..

وهو فى الغربة، يعيش هناك بجسده، ولكن روحه تسرى بيننا، فلا ينسى أن يكتب عن الارهاب وعن الاعتداء على نجيب محفوظ، والحسرة على فقد صلاح جاهين، عن شهر النصر أكتوبر، عن الدعاية الانتخابية فى مصر، عن شيطان الرحمة وقضية الممرضة المشهورة والتي ما زالت بين أيدي القضاء.

انظر الى قصائده التى تتفجر شعراً وخيالاً. ولكنه أيضاً يصرخ بها وهو واقف فوق جدار الغربة يطل على العالم والدنيا (الدعوة للسلام على الارض - الشاعر والوجدان - أهل الادب فى مصر - طلب عضوية).

وحيث يستجمع خزان خبراته لينسج الحكمة التى هى من سمات الزجل الاولى وهذه الحكمة تنتثر من خلال منظوماته كلها.. انظر إلى قصائده (وانا مالى - الانسان - مجرد حلم) وفى القصيدة الأخيرة ينسجها على منوال (فن القصة القصيرة وكتابتها) والتي برع فيها خالد الذكر بيرم التونسي.. ولكن شكرى ينظمها على الطريقة الحديثة، وآخر ما وصلت اليه كتابة القصة من إبداع.. وفى خيال وشاعرية

أيضاً.

• كلام كثير يمكن أن يكتب عن هذا الديوان الصغير في الحجم، الكبير في القيمة، ولكنى مضطر إلى الأيجاز - وفي عجلة لان الدكتور شكرى يريد إخراج الديوان من المطبعة في أيام قصيرة قبل ان تنتهى أجازته، ويرتد إلى بلاد الغربة.

• ولكن .. لا يفوتنى أيضاً أن أقول كلمة عن الموسيقى الشعرية عند الدكتور شكرى ، فهو أولاً ملتزم بالبحور والأوزان الشعرية الكلاسيكية، والتي هى رصيده وعدته منذ الابتداء وهو شاعر الفصحى أيضاً، ولكنه يلجأ إلى حسه الشعبى أيضاً فى انتقاء هذه الأوزان لتأتى مناسبة وملائمة للغرض الذى ينظم فيه، وإلى روح الالفاظ العامية، ولذلك تجد أن معظم قصائد الديوان الذى يتكون من أربعين نشيداً.. جاءت على وزن البسيط.. وزن الموال الشعبى الأثير عند العامة.. إثنى عشر قصيدة.. وبعض مشطرات هذا البحر، وهو يلجأ إلى التشطير كثيراً من خلال أوزانه كلها ، لأكساب الموسيقى حركتها الموائمة للشعور والاحساس الذى توازيه وتعبّر عنه.

ثم عبر ذلك إلى أكثر بحور الشعر شيوعاً بين الزجالين، فكتب من المتدارك أناشيد ثمانية، فالمتقارب خمسة، فالرمل

أربعة، وكل من الرجز والهزج والزجل إثنان،

- وقد أراد فى نفس الوقت أن يجارى شعراء العامية
المحدثين فى محاولاتهم لكسر البحر الشعرى، والاعتماد على
التفعيلة الواحدة كوحدة موسيقية للنظم فكتب من هذا اللون
قصيدتين.

- أريد أن أخلص إلى أن محمد شكرى لا يعتمد أوزانا أو
بحورا، وإنما هو يكتب على سجيته الشعرية، وإحساسه
الوجدانى هو الذى يملأ عليه النغم .. فيصدق به .. وهل
يقال للبلبل من أى مقام تصدح .. هو يصدق ويشدو .. وعلى
المتلقى أن يسمع .. ويتمتع .. ويضطرب ..

- من كل قلبى ، ومن كل قلوب أدباء الشعب بالاسكندرية،
نرحب بديوان الشاعر الشعبى القدير الدكتور محمد شكرى جاد
، سائلين المولى عز وجل أن يسبل عليه ستر العافية
والصحة فى الغربة، حتى يعود إلينا فى أكمل رونقه ..
وبهائه .. وأجمل شعره بالعامية .. لنقدم له الديوان الثانى
بأذن الله .. انه سميع مجيب ..

كامل حسنى

مايو ١٩٩٨

فيا حبيب

حبك .. ومين يعرفه إلا غريب الدار
والحب بيننا قدر .. يا كعبة الأحرار
لو عشت فى غربتى بين الحديد والنار
حاتهون لىالى الضنى لو عدت من تانى
واللى رضع منك .. غير مصر ما يختار

لما افكر للصبا .. أجمل عهود العمر
أو حتى أسمع غناوى للمعجون السمر
وان شفت ليلة القمر بين السحاب بيمر
أو حتى أسمع خبر يشعل لهيب قلبى
قلبى قوام يلتفت لام الروابى الخضمر

باشتاق اليكى على قد الهوى واكثر
حبك فى قلبى .. هنا .. فى كل يوم يكبر
لو أنسى افكر فى حبك .. قلبى حايض
طيفك باشوفه أنا .. دايما قصاص عيني
عليه هنا ف غربتى عايش ومتصبر

حبك .. رسالة غزل .. باكتبها للمحبيب
أو حتى ساعة رضا فيها استلم مكتوب
يا مصر : عاشق جمالك عمره ما بيتوب
صفحة فؤادى انكتب فوقها بيان الشوق
لو أنسى عهدك هنا راح تنكتب لى ذنوب

فيك الحضارة ابتدأت قبل الزمن بزمان
والنور بأرضك ظهر من حكمة الأديان
رفرف عليكى العلم .. بالعلم والإيمان
وف عز ليل البشر .. ناديتى بالتوحيد
ورفعت بين الأمم لنا أعز مكان

قلبي عليكى انفطر من جرحك العصرى
إرهاب بينزف محن داخل طريق نصرى
بيكى .. حايفضل على طول الزمن فخرى
وكفاية اسمك صبح فى غربتى اسمى
كل اللى شافنى هنا بيقوللى : يا مصرى

كانت صحيح زوبعة لكنها ف فنجان
دا الأمن فى أرضنا راح يبقى مهما كان
قالت وفود الدول : أرض الكنانة أمان
وبسرعة كان مؤتمر إسكان .. بيتحدى
لما نجح عندنا .. للأمن كان عنوان

ربنا قال وقتها .. والشعب قال وياه :
«ناخد من المؤتمر.. كل اللي يرضى الله
لوفيه تعارض مع شرع الإله .. نأباه،
قلنا وقالولنا .. وكان هم القلق واضح
بالحب وحده انتهى صوت الجدل إياه

نامت عيون العدا وعيونى ما نامت
فيه مشكلات عندنا يمكن تكون بانة
موجود كثير زيها فى العالم التالت
الحل هو العمل .. وزيادة الإنتاج
من حبنا مصرنا .. تلقى الصعاب هانت

فى حب مصر «الأملى، حا انشد لها الأشعار
فى حب مصر «العمل، مبدأ لنا وشعار
والانتماء للوطن بىكون أساس الدار
راجع يا مهد الصبا من غربتى راجع
فوق أرضك الطيبة .. حانكمل المشوار

واناجى فى غربتى عنك هنا شموعى
وقلت : حا اصبر أنا وأمسخ لها دموعى
حتى هموم الأسى خبيتها فى ضلوعى
وشلت فى مهجتى حبى وأشواقى
هدية منى يا حلوة ليكى فى رجوعى

يا مصر : شوفى نعم ربي .. مالىها حصر
لو قلت له : بجملك .. ما انتى جميلة العصر
وان قلت له : ينصرى فى اديكى راية النصر
لكن حا اقولله وانا ساجد على ارضك
نفضل نحبك كده طول الحياة يا مصر
طول الحياة يا مصر

رسالة من الغربة

يا اهل الأدب فرحتى بكم ما تتقدر
بينكم لقيت دنيى بالحب بتنور
لكن دوام الهنا فى الدنيا متعذر
مكتوب علىّ - وانا مؤمن - أودعكم
راضى بحكم القدر .. لكنى باتصبر

يا شعر .. يالى خلايا القلب من بحرك
سلطان .. ما يحكم على الشاعر سوى أمرك
سبتك لنادى الأدب وهريت من أسرك
حاولت أمسح هنا .. حزنى .. بأشعارى
مالقيت انا ف غريتى بحرك ولا برك

مين يلهم اللى انوعد بالشعر والألحان
فى الغربة إلا الألم والحزن والحرمان
وعيون حبيبتي اللى كانت تلهم الوجدان
ودعتها فى الوطن .. يامين يقابلها ..
ينقل رسالتى لها ويقول لها العنان :

«شايك في ليل غريتي بتتورى ليلي،
«وسمعت صوتك على بعدك يناديلي،
«لما كتبت بقلم حزنى .. مواويلي،
«نادى على الأمل من فوقى بصيت له،
«شفت القمر فى السما يبكى ويدعيلي،

الغربة كانت على نفسى قدر مكتوب
ودعت ساعة السفر قلبى وكان بيدوب
قاللى : راح أفضل هنا مستنى لما تتوب
رديت وقلت بأسف: ياقلبي ايه ذنبى؟
قاللى: انت سايب على أرض الوطن محبوب

عبد القاب

فتحت الباب ..
لقيت النور..
بيملى الكون .. دابر ما يدور
سحرنى صوت ..
طيور الشوق ..
وعشت اليوم .. هنا وسرور
وشفت بقلبي كون تانى ..
نجوم .. وزهور بوجدانى ..
وحسيت فرحتى بتكبر ..
وشفت محبتى بتكثر..
وقلت : الفرحة دى كتيرة على قلبي
وايه ذنبى؟
وحبى مهما خبيته .. بيان حبى..
وقلت لدمعتى : كفايه ..
دى فرحة عمرى ويايا..
لأول مرة يا قلبي ..
أشوف الدنيا دى جنة..

يا ريت يا فرح تستنى ..
حرام يعنى ..
.. فى عمرى ليلة أتهنى
واشوف الدنيا .. دى .. جنة
.....

باحس بحب غير عادى ..
واحب الناس ..
واشوف قلبى بينبض نبضته إحساس
طلعت أمشى فى وسط الناس ..
ودق القلب ..
دقة حب ..
وقال للناس : صباح الخير
بكل الخوف وضعت ايدى ..
على قلبى ..
وخفت يطب ..
لقيت قلبى بكل هدوء ..
يقول إحنا ..
.. فى عيد الحب ..

إعتراف

رغم الألم ..
اللى بيعصر مهجتي ..
رغم الضباب ..
اللى بيملئ سكتي ..
جايلك وانا حابر حزين ..
ويمهجتى جرح السنين
مقدرش أقول كلمة غزل ..
رغم ان قلبي الشوق مالیه ..
ولامتى أحلم بالأمل ..
والوهم مادد لى ايديه !
رغم الألم ..
رغم الضباب ..
رغم الليالى الموحشة ..
والإكتئاب ..
اللحظة دى باتكون فرح ..
يا تكون عذاب ..
وانا جاى عندك .. باعتراف ..

والاعتراف ..
هو اللي راح ينشل فؤادى..
من الفرق ..
قلبي اللي عاش الحب بس ..
على الورق..
وانا مها رحت .. ومهما جيت
اسمى بشر ..
هو اعتراف .. من كلمتين..
'أبوه باحبك،
يا قمر ..

الإسكندرية .. مدينتي

هو صحيح حبنا .. لسكندرية .. فرض ؟
أجمل بلد رينا هندسها فوق الأرض
وبرغم سير الزمن لسه شبابها غض
من قبل ما نتولد .. مكتوب على قلوبنا
حب الوطن عندنا .. زى الشرف والعرض

مدينتي .. ست المدن - غنيوة ما احلاها
فوق المهج .. كلنا .. رحنا .. كتبناها
عالبحر الابيض .. هنا .. كنا نظمناها
شافها الزمن .. وانبهر بيها ولحنها
واسكندراني جدد .. خدنا وغناها

م «النزهة للمنتزه، تلقى الجمال ألوان
حورية تخطر ورا حوريه فى الوجدان
والخضرة تحيي الأمل فى مهجة الفنان
وان يوم رماك الهوى انظر «بنات بحرى،
وان رحت «السلسلة، حاتسلسل الأحزان

فاكرى يا مهد الصبا فى غريتى فاكر
ملاح فى بحر الأمل غيرى كثير هاجر
لكن أنا وسطهم حزنى مألوش آخر
مشتاق لنسمة هوا منك تداوينى
وارمى هموم دنيتى فى «المالح، الساحر

آه يا مدينة الهنا .. لو كان يرايدى بجد
كنت ف تراك غرست المهجة تطرح شهد
وزرعت قلبى وانا بامنى يطلع ورد
وطرت من لهفتى ويا طيور الشوق
فوق أرضك الطيبة .. أفرد جناحى فرد

السرف فى فتنتك ياسكندرية .. الناس
طيبة وشهامة .. وكرم فى رقة الإحساس
والشعب قال غنوته فيهم بكل حماس :
أجدع من الجدعنة .. ياسكندرانىة
اقروا معانا سوى الفاتحة «لبو العباس،

فى الدنيا .. فىه كام بلد اسمك لها عنوان
وانت اللى بينهم لها تاريخ مع الإنسان
تشهدك «المكتبة» .. أو «مسرح الرومان»
يشهد «فنان» كان هنا أعجوبة الدنيا
ان الحضارة لها فى اسكندرية مكان

كام مهرجان فى السنه لعبونك الحلوة
كام لحن فوق الوتر عنك وكام غنوة
حبك قدر وانكتب فى قلوبنا من جوه
إبنك - وزى السمك - عن بحرہ لو يبعد
تلقاه يا عينى بلا حوله ولا قوة !!

ياسكندرية : اسعدى فى مجدك الباهر
كام نجم ساطع نبغ .. فى عهدك الزاهر
«بیرم وشيخ النغم» والقائمة للآخر
وان كان بنى مصرنا فى الأصل حلوانى
اللى بناكى جدع .. فى الأصل كان شاعر

حفظك يا أمي فين

فاتت سنين الهنا والفريه حاضناني

حضنك يا أمي فين؟

مشتاق أشوفك أنا والبعـد أضناني

وانت لعيوني عين

الرحلة طالت على قلبي ووجداني

والروح بتشكى لهم من كتر أشجاني

ايه اللي كان ياترى بالفريه غواني

يوم الوداع ابتعدت يا أمي أحزاني

صدر الضياع ضمنى جرح الفراق هدنى

حضنك يا أمي فين؟

كان لما بيضمنى الدنيا ما تهمنى

وانت لعيوني عين

أُمى .. يا حُضن الهنا راح الهنا م القلب!
والحب ضاع وأنتهى نهر الحنان العذب!
م الفكر يا لوعتى صعب إنى أنسى صعب
حكم القدر والقدر ماشى علينا غصب

الجرح فى مهجتى والحيرة فى وحدتى
وانت لعيونى عين
واسأل انا بدمعتى واللهفة من غريتى
حُضنك يا أُمى فىين؟
حُضنك يا أُمى فىين؟

الكلمة جبة

قوم من فراش المرض قوم يا نجيب محفوظ
خلى الشيطان يندحر خلى المؤامرة تبوط
هجم عليك معتدى لكن لقاك محظوظ
وبقلبه الاسود طعن مصر بسلاح أبيض
واللى معاه رينا .. لازم يكون محفوظ

رمز الأدب ينضرب .. هى الحضارة ايه!
والكلمة ليه ردها خنجر ومدفع ليه!
ليه الحوار انقلب والعنف يطفى عليه
أدب وقلة أدب .. يتصارعوا يا عالم
عجيب عليك يا زمن تحكم علينا بيايه؟

ياللى سلاحك قلم فى الصخر عدى وفوت
بالكلمة تحيى أمم. والموت بدايته سكوت
واسمع حكاية قلم يجرى وراه نبوت!
كان الطلب والهدف لما كسب «نوبل»،
لو يوم قدر يكسره .. الكلمة ما بتموت

إنهض يا سيد الأدب المجد لك والفخر
دا البقى مسهما فجر لازم حاييجى النصر
قلب العروبة خفق يدى لعمرك عمر
والعالم اللى عرف فضلك بيدعيك
يسمع لهم ربنا .. ترجع لأمك مصر

حلم والا ايه ..

آه يا عيني آه باليلي في الفراق احتار دليلي
كان لقانا يا حبيبتي حلم والا ايه قوليلي

كنت في جنة هواي وانت جنبى يا ملاي
النعيم في عيونك انتي والسعادة في رضاي
وافتكر ساعة لقانا وانتى واقفه تندهيلي
الدموع تفرح في عيني حلم والا ايه قوليلي

الليالى الحلوة تجرى والقى نفسى في المطار
غريتي بتنده عليّه ولوعتى في الانتظار
لما تلعب بي شجوني وافتكر ساعة رحيلي
الدموع تجمد في عيني حلم والا ايه قوليلي

واحضن الغربة وجراحي نار بتحرق أمنياتي
وافتكر ياسكندرية فيك أحلى ذكرياتي
ياترى ترجع لى تانى والحبيب يشفى غليلي
بعد ما يمسخ دموعي حلم والا ايه قوليلي

تنبيه ان الرحمة

مين الى يقرأ ومين يسمع	مين الى يشوف
يا مسئولين عن ارواحنا	اعملوا معروف
لسه التسبب فى حياتنا	والجـهـل إياه
معقول بيحصل فى بلدنا	الى سمعناه
بيقولوا إن ملاك رحمة	أصبح شيطان
وخلى مستشفى الجامعة	بؤرة أحـزان
إجرام ومتخفى ببالطو	بين التـمـريض
فى غرفة الإنعاش يقضى	على كل مريض
مفـيش لافائدة ولا عايدة	أزمة أخلاق
ما دام يكون فى المستشفى	للموت أسواق
فين الأمان فى الدنيا دى؟	الطف يا لطيف
والرحمة يا وزارة الصحة	دالظلم مخيف
شوفوا المريض بعيون تانيه	مليـانـه حنان
مريض ماهوش استثمارى	برضك إنسان
شوفوا المريض اللى بيدخل	غرفة إنعاش
واهتموا بيه راح يدعيلكم	طبعاً إن عاش

أيام حبك

ولقيتني وأنا مهموم ..
باتمنى وأقول : ولا يوم ..
ولا يوم من أيام حبك ..
يشفى فى الغربة جراحى ..
ولا كلمة حب جميلة ..
تيجى تجدد أفراحى ..
حاسس بفراغ وكآبة ..
والنبض بقلبي دموع ..
دى دنيا .. والا دى غابة ..
عايش فيها موجوع ..
والأمل اللئى اتمنيته ..
فى عيونك انت لقيته ..
.... من أول يوم حيت ..
كان حبك نور دنيايا ..
لما انت كنت معايا ..
... وف بعدك ما اتنهيت ...

الناس قدامى ألوف ..
لكن غيرك ما باشوف
... وان قلت : يا ريتنى .. بكيت ..
الروح تسبح فى ضباب ..
ونعيم الغربة عذاب ..
... وسراب من خلفه جريت ..
وارجع للماضى بحيرتى ..
والنور يملئ وجدانى
واهتف من قلبى : يمكن
لما ارجع لك من تانى ..
تصفالى الدنيا وتحلى ..
واشوف عندك أفراحى ..
أو يوم من أيام حبك ..
فى مصر، يداوى جراحى ..
وما دمت غريب مهموم ..
حا اتمنى واقول : ولا يوم ..
... ولا يوم من أيام حبك ..
... ولا يوم من أيام حبك ..

دَلِيلَا ..

عيني وقلبي وكل جوارحي تنزف حزن ونوح وأنين
لما بأشوف أحوال الدنيا ايه حانقول ونقوله لمين؟

يوم ورا يوم عدوان وضحايا قتل ونهب وموت وخراب
مين ينصفهم بعد ماضاعوا وعاشوا بعد العز عذاب
وآجى اتكلم قلبي حزين ايه -حانقول ونقوله لمين
كون متحضر لكن ظالم بيعيش جوه عصر الغاب

وانت يا مسلم شوف اخوانك تحت الظلم ف أى مكان
ايدكم واحدة قلبكوا واحد ضد شيطان الإنس كمان
لو نتجمع بالملايين .. ايه حانقول ونقوله لمين؟
فعلا ممكن نعمل حاجة ونخفف بعض الأحزان

عيني وقلبي وكل جوارحي تنزف حزن ونوح وأنين
لما بأشوف احوال الدنيا ايه حانقول ونقوله لمين؟

أَتْبِعْ مِنَ الْإِبْتِمَامِ

فى الغربة تيجى هنا أخباركوا بتلالى
وتحير اللى بقى حاله .. كما حالى !!
بيقولوا : كل السلع أسعارها فى العالى
ما عاد رخيص فى البلد إلا بنى آدم
يا ريتته زى السلع بيقى كمان غالى

الشاب ليه يترك عالف بشهادته
ما يلاقى شغله ولا نظرة إلى حالته
ويروح قوام يستلف بيقى السفر غايته
ويجيله عقد العمل بعد العذاب كله
ولحد يوم السفر يحلم .. على عادته

آه يا شباب البلد من فتنة الأحلام
عشان نسيب أرضنا نستعجل الأيام
قدام عنينا هدف لكن من الأوهام
ويشوكها تفتح لنا الغربة أحضانها
ويقول علينا المثل : أضيع من الأيتام

فيه اللى يرجع وحاله مايسر حبيب
واللى بيرجع على أول طبيب ما يطيب
واللى فى سجن العرب للقهر والتعذيب
أما اللى نال رحيمته وارتاح من الدنيا
فى نعش طاير بيرجع عبرة للترهيب

أما اللى حظه ابتسم يومها بكثير وقليل
نفسيته اتدمرت على إيد كفيل وكفيل
الغربة لو تعرفى يا مصرهم طويل!
واحنا اللى طول عمرنا خيرنا على غيرنا
ليه العرب حكمهم قاسى على ابن النيل؟

مفاتيح فائدة

كتبته كثير مفيد فائدة..
وقلبي احتار
ومهما اكتب مفيد فائدة..
من الأشعار ..
بنجری كثير ورا الأحلام..
ونبنى قصور من الأوهام..
ونبعد عن حياة الناس ..
ونرمى اللوم على الإحساس ..
وقلنا : احنا اللى بقلوبنا
نشوف النور
ونبنى فوق جراحنا قصور..
وإن احنا اللى راح نزرع حياتنا زهور
حياة ..
ألوانها وردیه
وملئانه بكل جمال
دی دنیا احنا عشناها
خیال فی خیال

بنهرب فيها لما الشوق ..
بيقتلنا .. ويحيينا ..
بنهرب فيها لما الجرح ..
بيعذب أمانينا ..
بنهرب فيها لما نحب ..
نرجع يوم لماضينا ..
نخدر فيها أحلامنا وأيامنا اللي مجروحة
وينعوض دمانا اللي بأرض الحب مسفوحة
دى دنيا احنا عشناها ..
خيال فى خيال ..
ومين فى عصرنا يقدر يعيش بخيال !.

.....

وياما قلنا .. دى قلوبنا .. قلوب بتطير
تجيب الفرحة والأحلام تجيب النور
وتملئ الكون هنا وسرور
قلوب بتطير فى كل مكان ..
وكل زمان ..
وتفضل فى الفضا وتدور ..

وناسيين إن أيامنا .. من الآلام..
تحاول تتسى فى دنيا .. من الأوهام ..
دا مش قلب، اللى فى ضلوعنا
دا اسمه «غرور»
صحيح انه يطير بينا كثير ويدور !!
ولكن جوه فى عالم كنيب مهجور..
وحتى ان طار يجيب النور
بيرجع تانى متندم ..
جناحه خلاص .. بقى مكسور ..

....

دفنت همومى فى شعرى
دفنت كثير ..
وداب القلب فى جرحه..
من التفكير ..
حانرجع تانى يا قلبى
نتوه فى خيال .. مع الأوهام
نخدر تانى أيامنا ..
نخدر كل آلامنا ..
فى دنيا الشعر والأحلام..

ودى دنيا دعائهما خيال فى خيال
مفيش فائدة من الإنكار ..
وادينى غصب عنى باعود
واهيم فى عالم الأشعار ..
حا اعود واكتب بقلب جديد
راح اكتب رغم آلامى ..
واسجل كل احلامى ..
انا حاكتب عن الإخلاص
وعمرى ما أقول : ياقلبنى خلاص
انا حاكتب عن اللى راح ..
دا ياما الشعر داوى جراح
حا اسيب الحزن لصحابه
واعود اكتب عن الأفراح ..
انا خارج لألحانى .. اغنى نبض وجدانى
انا حاكتب باشعارى .. حكاية قلبى من تانى
دى دنيا .. احنا عشناها
خيال فى خيال ..
ولكن كل ما فيها .. جمال فى جمال..

لا .. للإهباب

آه يا زمان الأسي هات لى مواويلك
يمكن فى لحظة شجن قلبى يغنى لك
باسأل وكنى أسف تطفى قناديلك
إزاي بكام زويعة يعملها إرهابى ؟
والأمن لو بنقتل .. ياطول سواد ليك!

فى ليلة غاب القمر عنها صحا الإرهاب
دبل زهور الأمل فى مهجة الأحباب
والبسمة تاهت شفايفها ونورها غاب
ساد القلق وابتدت أرض الحمى تغلى
قامت بكام زلزلة يا هلترى دا عتاب!

لو يختلف أمرنا فيه اللى اسمه حوار
بيننا وبين بعضنا .. مش بالحديد والنار
القتل مش شرعنا والنهب أكبر عار
والكلمة هى اللى بس تواجه الكلمة
داحنا جيران والنهى وصى بسابع جار

ليه يزرعوا حقدهم وكأنهم أغراب؟
فى أرضنا الطيبة «طيبة»، اللى لسه شباب
والحب ليه يتحرق؟ والأمن ليه ينصاب؟
دى الطلقة لو تتطلق ما عندها تميز!
هو احنا راجعين ورا تانى لشرعية الغاب!

طول عمرنا أرضنا مهد الأمان والدين
كان الأمل والمنى نفضل كده عايشين
إيد واحدة عند المحن ساعة العمل جاهزين
والمولى قال : ادخلوا آمنين بإذن الله
مصر العزيزة.. انما مين اللى يسمع مين؟

مقدرش أقول : دا زمن ولى زمانه وفات
مقدرش أقول : عصرنا عصر التلات ورقات
والدين مظاهر لها عند البشر أوقات
لكن بكل الرجا بارفع إيديه لفوق
واهتف واقول : رحمتك الصبر أصله مات

العالم الذى اتبهر بينا .. صبح مذهب
يبص لنا بحذر .. مستى ايه حانقول
وعيونته تجرى على مسئول ورا مسئول
دا الأمن مخلوق لنا طول الزمن يا ناس
واللى جرى..زوبعة فنجان.. ومش حاتطول

يا مصر انت الحضارة والتاريخ والنصر
أولادك الذى على حبك .. مالىهم حصر
قومى ارفعى للعلا رايتك بعزة وفخر
ما يهكم الذى خرج عن صفنا وقولى :
- فى نشوة المنتصر - لا ..

واسلمى يا مصر

لسه فاكرك..

لسه فاكرك ..
أيوه فاكرك ..
عمرى ما نسيت اللى كان ..
هان عليك الحب .. لكن ..
عندى عمره فى يوم ما هان ..
واللى كان فى القلب جوه ..
من عواطف
من حنان
لسه فيه وزيادة اكتر ..
قلبك انت مالوش أمان
أما قلبى
آه يا قلبى
لسه زى ما كان زمان ..
.....
آه يا قلبى .. يا حبيبى
ياللى قاسيت م الحبايب

مش حا الومك ..
دى طباعك ..
والنتيجة .. جيت لى دايب !!
بعد ما رحت بعنانك ..
بالهوى .. للى باعوك ..
بعد ما قلت بعنادك ..
دول حبايبي ..
جم خانوك ..
مش حا الومك ..
مش ها اعاتبك
احنا الاتنين الضحية
ابكى يا قلبى عليك
والا تبكى انت عليه
آه يا قلبى يا حبيبى
انت دلوقت اللى ليه .

كلمة .. وهمسة

بنبض الأمانى ودمعى الحزين
لكل الضحايا من المسلمين
باحول شجونى لكلمة وهمسة
ومين اللى يسمع ويفهمنى مين

دى كلمة باقولها بنبض الأمانى
وحافضل اقولها بروحى وكيانى
رضا ربنا فى جهاد الأعادى
بقوة سلاحكم ما هوش بالأمانى
ضريبة على كل مسلم أمين
يدافع عن الحق يا مسلمين
ولما حانتحرر «البوسنة» تانى
ويصفى زمانهم حايفصفى زمانى

وهمسة باقولها بدمعى الحزين
لكل الضحايا وحزنى بيكبر

واقول للشهيدة واقول للشهيد
إلى جنة الخلد كان المقدر
ونلتوا الشهادة ومجد السنين
وسبّوا الأمانة مع المؤمنين
إلى النصر ويا حبايب السلام
سلاحكم على الظلم والله أكبر

وابعت ندايا لكل الوجود
واقول امتى عالارض ييجى السلام
رمىّوا على الأرض غصن الزيتون
وبالقسوة جيّتوا دبحتوا الحمام
بانادى ومن مصر عالعالمين
على كل ملة على كل دين
إذا البوسنة، ضاعت وضاع السلام
يا دنيا : على الدنيا منى السلام

دعابة انتفاية ..

أوعدكم .. انتخبوني «ويشرفى، راح تلاقونى
وياكم هنا فى الدائرة أديكم يومها عيونى

أبناء الدائرة حبايبي الخدمة العامة شعارى
أوعدكم إنى أستنى فى الشارع ليلى نهارى

دنا من حبي واخلاصى رشحت عشانكم نفسى
والعيل قبل الراجل أسمع له بقلبي وحسى

ومشاكل أهل الدائرة هى مشاكل الشخصية
والنوم حاىخاصم عيني لو أقصر فيها شوية

أوعدكم إنى أطالب بحياة العز الواسعة
بزيادة أجرك طبعاً ومكان لابنك فى الجامعة

وازاى حرمك تحتار علشان السوق بقى نار
وما دام راح تتخبونى تنزل كل الأسعار

أوعدكم أروح المجلس واحضر كل الجلسات
ولا أزوغ يوم مع صاحبى ولا أنام فى الاجتماعات

وأطلع أتكلم دايمًا ونا صوتى والله عنيف
واوعدكم اسيب الشلة أعضاء حزب التسقيف

أوعدكم راح تلاقونى وأزوركم وتزورونى
واشيلكم جوه عيونى بس انتوا .. انتخبونى

هدفنة

من ساعة ما قابلتك صدفه
وانا مش عارف ليه مشغول
ياما حاولت انطق بلسانى
بكلمة حب .. وخايف أقول
كل كلامى بيهرب منى
لما عنيكى تقابل عيني
حسنك قادر ويبسحرنى
واحترار بين الخوف وحنينى
شياء اكبر منى بيدفعنى
أهرب منك قبل ما اشوفك
والمكتوب مين يهرب منه
مين يهرب من سحر عيونك
سحرك طاغ عنيد متجبر
حسنك فاتن مش متكبر
شياء بيحير شياء بيغير
شياء مش عارف عنه أعبر

مهما يدبر قلبي معاكى
مهما يفكر مش راح يقدر
لو يوم حاهجم بجيش حبي
ألقى سلاح الشوق يتكسر
طفياناً حسنك جبروت سحرك
ظلم هواك وقسوة قلبك
وجحيم بعدك ونعيم قريبك
والجرح اللى حايفضل بعدك
فوق إماكن القلب العادى
فوق ادراك القلب القادر
يبقى حايعمل ايه يا حياتى
لما يقابل .. قلب الشاعر
دايماً دايماً باسأل نفسى
لما جراح الشوق بتطول
من ساعة ما قابلتك صدفة
وانا مش عارف ليه مشغول

من بهم ما غاب

من يوم ما غاب عنى القمر مفيش لا حس ولا خبر
اصبر يا قلبى دالهوى والفرح فيه للى صبر

كانت لنا .. أيام هنا والعمر ايه غير يوم هنا
كان حينا بيضمننا فى كل يوم واحنا هنا
مكتوب علينا والقدر حكمه على كل البشر
اصبر يا قلبى دالهوى والفرح فيه للى صبر

مش قادر أنسى بسمتك والعمر ايه غير ذكريات
أيام ما عشنا فى الهوى عهد الهوى بالأمنيات
من إمتى يا غالى السفر خلى القلوب تبقى حجر
إصبر يا قلبى دالهوى والفرح فيه للى صبر

كان قلبى موعود بالهوى والحب ما كان له حدود
ضيعت إنت والأمل ما فى أمل تانى تعود
ما عاد لنا غير الانتظار والشعر والشوق والسهر
اصبر يا قلبى دالهوى والفرح فيه للى صبر

فكرت لو أعمل علاج	ينفعنى بعد ما ترحلى
مالقيت لجرح الشوق دوا	رغم انى فعلا ، صيدلى،
لكن باصبر نفسى فى	بعدك واقول حكم القدر
اصبر يا قلبى دالهى	والفرح فيه للى صبر

عيني عليك يا ولد

عيني عليك يا ولد يا شاعر الوجدان
يا شحنه من عاطفة اتشكلت إنسان
تحرق في دمك على كلمة من الأوزان
لما تقولها تزلزل .. اللي يسمعها
ويقولوا شاعر جدع واد انما فنان

تحمل هموم البشر .. في قلبك المسكين
والكلمة عندك دوا لكن تقولها لمين!
فوق المنصة درر تهديها للسامعين
والكل معجب على شعرك .. بيتمايل!
طول ما انت واقف على رجلك اهم قاعدين

في كل ندوة لهم لهفة إلى شعرك
في كل إعلان لهم دايمًا يكون رسمك
في كل سهرة لهم راح يمدحوا علمك
والشاعر اللي ظهر .. بيشجعوه .. لكن
لو يوم لسانك وقف راح يتنسى اسمك

ان قالوا : لك مدرسه .. صدقت يا مسكين
وان نمت .يوم م المرض .مين اللى يسأل مين
يمكن لاسمك مكانه بارزه فى الجرائين
لكن بكل الأسف فى النعى سطر ونص
وابقى قابلنى اذا عملوا لك .. التأبين

عيني عليك يا ولد .. من رحلة النسيان
تصبح خبر وقتها وتحس بالحرمان
ما يزورك إلا الأسى والفكر والأشجان
فين اللى كانوا على شعرك يبتمايلوا
راحوا لغيرك ماهى دنيا ما فيها أمان

مادمت بينهم حاتلقى الكل قال : الله
لكن ياويلك إذا ليلة نطقت الآه!
إن غبت عنهم نسوا إسمك وضعت معاه
وان جابوا سيرتك وقالوا : أيوه كان شاعر
حاتلاقى واحد نطق فى استهانه : آه

عینی علیک یابلد والذکریات بتفوت
والشاعر الی نبغ .. بیعیش هنا مکبوت
وستاره تنزل علی اعماله لما یموت
تکریم حیاته وموته حظ مش اکثر
مقدرش أقول : دی شلل تحکمها بالنبوت

تکریم رجال الأدب فی عمرهم واجب
تلقى الأديب يتحرق دمه ومش عاجب
وان مات واصبح أثر تحت التراب دایب
تکریم نبوغه يجب نهتم بیه اکثر
والفضل يرجع لصاحبه حتی لو غایب

بحر الفؤاد

حبيبتي يا أمي يا جرح الفؤاد
يا حاضرة واحنا اللي عنك بعاد
خدتنى الليالى وآه م الليالى
ومكتوب لى بعدك اتوه فى البلاد

.....

يا شمة وكانت تنور حياتى
يا باقية فى قلبى وفى ذكرياتى
أخفف شجونى وحزنى بإيه ؟
تضحى وهمك سعادتى وفرحى
يا بلسم جروحي بقيت انت جرحى
وما عرفش بعدك أداويه بإيه ؟
وتجرى الليالى وتيجى ف معادك
وذكراك باقية فى مهجة ولادك
حبيبتي يا أمي
حبيبتي يا أمي

.....

بافكر وباحلم يا ست الحبايب

أنا اللي باحبك حاكون اللي غايب
وما حضرشى عيدك لاني غريب
ومكتوب لي بعدك أفارق بلادى
واتوه في الليالي وافضل اتادى
يا أمى .. يا أمى .. وحيدك غريب
واصبر .. واصبر فؤادى الجريح ..
داشء فوق إرادتى وطاقتى بصحيح
حبيبتي يا أمى
حبيبتي يا أمى

.....

وحرمانى منك بيجرح كيانى
وغربة حياتى بتجرح أمانى
واقابل وجودى بقلبي الحزين
وذكراك تيجى وتيجى الحبايب
وانا لوحدى يومها حاكون اللي غايب
وبس اشكى همى وحزنى لمين ؟
عذاب الليالى وآه م الليالى
ما كان حد غيرك بيشعر بحالى
حبيبتي يا أمى
حبيبتي يا أمى

باشوفك يا حلوة فى كل الوجود
وجودك معايا ما يعرف حدود
وانت الحقيقة برغم البعاد
هزمت الليالى وجرح الليالى
وطرت بجناحك على كل على
وفضلت يا أمى رب العباد
حبيبتى يا أمى يا جرح الفؤاد
يا حاضرة واحنا اللى عنك بعاد
حبيبتى يا أمى
حبيبتى يا أمى

أهل الأدب

قلبي اللى عايش بعدكم يتمنى ساعة قريبكم
عايش شريد عن حيكم فى غربته ويا الألم
وتطول لىالى وحدته ويزيد حنينه ولهفته
يحكى بدموعه قصته ويعض إبهام الندم

ما كنت بانساكم ولا -غيركم فى قلبى يوم -حلا
يا اهل الادب وانتم على طول الزمن أهل الكرم
لما حايجمعوا الهوى وتعيشوا فرحتكم سوى
مين يفتكر قلب انكوى من أنسكم ياما انحرم

فين السكينة والسكن والقلب فى حزنه انسجن
فى غربته ويا الشجن يلقي الوجود زى العدم
باشتاق لمصر وسحرها واسكندرية وبحرها
انتم عبيرها وعطرها والنيل وحشنى والهرم

وأحلم بقرى منكم والذكريات ترجع لكم
مكتوب على احبكم يا اهل الكتابة والقلم

بیشدنى ليكوا الوفا وتحس روحى بالدفا
دا البعد كان زى الجفا والقرب من أغلى النعم

قلبى من الحزن انفطر لما افكر عهد السمر
وانتم لا حس ولا خبر يا اهل المروعة والشمم
فى اسكندرية حبنا فى كل ندوة تضامنا
الشعر ينبع من هنا والكون بيتعطر حكم

دا الشعر فتح زهرنا جمل حياتنا وعمرنا
إحنا اللى قمنا بشعرنا نملى الوجود كله نغم
يا اهل الأدب مين قدكم الدنيا دى فى يدكم
أنتم ملوكها بفنكم والشعر هو اللى حكم

راجع بشوقى ولهفتى سايب جراحى وغربتى
بينكم باحس بعزتى مصريتى .. فوق الأمم

تنتهي النهر

شهر اكتوبر شهر النصر ييجى معاه الفرحة لمصر
عشت يا مهد النور والخير رافعة دايمًا راية النصر

شهر اكتوبر شهر النصر

الأمجاد دايمًا أمجادك والأعياد دايمًا أعيادك
لما تنادى الحرب علينا ترد عليها صدور أولادك
وقت السلم احنا الصناع مجدك حق علينا يا مصر

شهر اكتوبر شهر النصر

راح «بارليف»، والخط بتاعه اللى اندك هناك بإيدنا
لما عبرنا النكسة عبرنا لما عرفنا الله عدنا
لما نصرنا الحق العربى كان النصر هدية لمصر

شهر اكتوبر شهر النصر

لما يجينا عيد ورا عيد لازم نذكر كل شهيد
اللى بدمه كتب ملحمة وسجل بيها بعث جديد
واسمع صوته فى يوم النصر بيقول تانى : عمار يا مصر

شهر اكتوبر شهر النصر

على فبين حاتروح

على فبين حاتروح يا حبيب الروح ..

ولمين حاتسب قلبي المجروح ..

....

باشتاق لعنك الحلو كثير ..

وياحن اليك وانت معايا ..

والحب مالوش عندي تفسير

غير إني باحبك .. وكفاية ..

ومفيش يا حبيب الروح تعبير

يقدر بشرح كل هوايا ..

حاتغيب مهما تغيب قلبي معاك

وان طال البعد انا حا استناك

الورد حايدبل لما تغيب

والشمع حايبكى أعز حبيب

والقلب مالوش فى الحب نصيب

ما كفاية خضوع

وسهر ودموع

ولإمتى أعيش على خط النار

دا انت الالهام
وانا والأحلام
خلدنا عيونك بالأشعار
يا حبيب الروح
يا فايئتي وجوه القلب جروح
على فين حاتروح
ولمين حاتسيب قلبى المجروح ..

.....

يا واخذنى معاك مطرح ما تروح
دنا قلبى ما يتحملشى جروح
حا تروح وتغيب يا أحب حبيب
مش قادر أنسى لياالى صفاك
أيامك حلوة ومش حا تغيب
أيامها عرفت الفرحة معاك
لو تعرف

- جرحى قوام حايطيب ..
لو ساعة تفكر فى هناك
انا جاى ويقول : يا حبيبى وداع
وكأن فوادى بعدك ضاع ..

العود حـا يغنى بلحن حزين
والبدر حـا يظهر تانى لمين
والنبض ف قلبى كله حنين
دا القلب احتار
بين جنه ونار
وعيون مليانه بالأسرار
وعشان باهواك
انا حـا استناك
واحلم برجوعك ليل ونهار
يا حبيب الروح
يا فايته وجوه القلب جروح
على فين حاتروح
ولمين حاتسيب قلبى المجروح.

بكرة يا قلبى

بكره يا قلبى نشوف الدنيا غنوة حب بلحن جميل
حاسه يا قلبى بفرحة عمرى جايه تنور لى القناديل
بكره يا قلبى

أملى كبير فى الدنيا يا قلبى أعيش واتهنى أملى كبير
دايما أحلامى على قدى أفرح بيها يا قلبى واطير
انا باتفائل ليلى نهارى عمر ما فيه فى الدنيا محال
دنا يكفينى حبيبى معايا كفايه علينا راحة البال
بكره يا قلبى

أنا حببت الدنيا وشايفه فرحة عمرى جايه وخايفه
إزاي قلبى حايثحملها كنت حاقابله ضرورى وعارفه
ان الدنيا حاتصفى يا قلبى وتحقق كل الآمال
دنا يكفينى حبيبى معايا كفاية علينا راحة البال
بكره يا قلبى

أمل العمر لقيته معاها صدفة وكانت خدنى هواه
لما قابلته وشفت عيونه فيها الطيبة تهت معاها
أنا مش عايزه جاه ولا مال ولا يغيرنى أى جمال
دنا يكفينى حبيبى معايا كفاية علينا راحة البال
بكره يا قلبى

مجدد حلم...

فى يوم .. حلمت انى طائر .. بجناحات الشوق
ولقيتلى طائر بسرعة وكنت طالع .. فوق
وفوق حدود القمر .. فجأة نزلت قوام
كأنى كنت ف حقيقة .. رغم إنه منام
رمىت جناحى وقلت اقعد هنا وارتاح
لكن عيون القمر .. سابت فى قلبى جراح
لا قدرت تانى أطيّر .. وارجع إلى أهلى
وآدى جمال القمر .. ناوى على قتلى
ما شفت جنبى بشر .. ييجى يواسينى
غازلت من وحدتى نجمة قصاص عيني

.....

ومسكت راسى بإيديه وتهت فى الأفكار
وبدال ما اطيّر .. التقيت برج ف دماغى طار
ما اعرفشى فات قد ايه فى وحدتى ديه
ورفعت راسى لقيت .. قدامى حوريه
ولقيت نجوم السما مالىه الفضا بالنور
وينشوة قالت : أنا أحلى بنات الحور
وكنت طايره هنا .. شفتك حزين حيران

قلت لها : من وحدتى .. مالى هنا خلان
بالله عليكى اسمحى نسهر سوا ونظير
ولففينى القمر .. دا الضيف مقامه كبير
بيقولوا إن القمر يسحر قلوب الناس
شاعر أنا ومهجتى .. كتلة من الاحساس
خلينى أشوف من هنا سحر النجوم فى الليل
خلينى بين الزهور أنسى الأسى والويل
مش عايز ارجع لهم فى الارض .. وكفايه
حا استنى فوق القمر .. بس انت ويايا
آدم أنا .. والتقى فوق القمر حوا
بركان غضب وانفتح .. صوت الجحيم دوى :
هو كده طبعكم .. يا عالم الانسان !
مات السلام وسطكم .. واتدلع العدوان
ولقيتها غضبت .. وبان الغدر فى عنبها
حسيت برعشة ندم .. ونويت أراضبها
قلت لها : ليه تغضبى .. عندك لحالى حل ؟
قالت : كلامك هنا .. فيه احتيال محتل !
م الأرض جيتنى .. وطاير ربع مليون ميل
طمعنا فى حفلة هنا ويا نجوم الليل !

وتعيش معا يا كما آدم وحواء تحت
فكره يجينا الولد تبقى كده ارتحت ؟
ونعمر احنا القمر بالناس كما فى الأرض
ويقتلوا بعضهم تانى وياكلوا ف بعض
سيبوا القمر يا بشر هو كده للحب
وانتم كما شأنكم .. فى كل دولة حرب
وان كان على وحدتك الأرض سهرانه
وان كنت تسعى لحواء الأرض مليانه
إنزل وروح أرضكم تلقى النساء ألوان
حبا ارميك أنا من هنا للأرض .. يا انسان
وقبل ما انطق لقيتها بسرعة بتصفر
ولقيت حوالى متين مارد بيتحضر
قالت لهم اسمعوا .. والكلمة أمر وفرض
أدى غريب وسطنا .. يا الله احذفوه عالارض
ونزلت زى الصاروخ عمال الف وادور
والأرض بتشدنى وانا بجناح مكسور
وقبل ما اعمل حسابى .. كنت بهيموى
خبطت فى الأرض خبطة .. طيرت نومى

صلاح جاهل

ما نسيتهش أيا منا الحلو	يا صلاح جاهل
يا أحلى غنوة فراحية	تهز الملايين
علمتني إن الكلمة	فن واحد
تطلع من القلب الشاعر	توصل للناس
دوقتني طعم الغنوة	قبل التحسين
وازاى أدور عالکلمة	والفكر ضنين
فهمتني إن الشاعر	فن والقاء
وازاى اكون دايمًا قادر	بين الشعراء
من بحر فنك وسقيتني	حتى الإشباع
أخذت بايدي ووديتني	ساحة الابداع
وقبل قلبك كان بيتك	دايمًا مفتوح
وخدتني ايدى فى ايدك	م طرح ما تروح
كام ندوة فى الشعر الراقى	بينى وبينك
قلمتي اشتكاني واوراقي	يوم حبيتك
عودى اللى كان أخضر يومها	وياك اشتد
وقلت لى إوعك تركز	ابدا على حد

سجلت في الشعر الشعبي	للمجد فصول
ما انت بقيت فنان شامل	بتصول وتجول
لك قبلنا الخطوة الأولى	في كل سبب
تشهد عرايس مسرحنا	إنك سبب
حتى الرباعيات فيها	علم وحكمة
دا كل شيء في الدنيا دي	فعلا قسمة
لك بصمه في الرسم الساخر	انك استاذ
في الفن عمرك ماتقرب	للمعنى الشاذ
وقابلت «سيد مكاوي»	ليلة أشجان
والليلة لو تبقى كبيرة	العظمة تبان
أما نشاطك في السيماء	شيء مش معقول
(وخلي بالك من زوزو)	أحسن حاتقول
يا أحلى غنوة فرايحية	تلك السامعين
ما نسيتش أيامنا الحلوة	يا صلاح چاهين

مبدلية الحب

أنا فى صيدلية حب ولكن فى هواكى أديب
علوم القلب أفهمها وعندى علاج لكل حبيب
تلاقينى فى طب الحب شاعر صيدلى وطبيب
ولو أمرى ببقى بأمرى وكنت طبيبك المفتون
بدستور الهوى الطبى راح أوصف لك علاج مضمون
وكنت أعمل فى تركيبه تزيل عنك هموم وهموم
بإذن الله لو اعملها وتأخذها حاتصى فى يوم

حاندخل معمل العشاق معايا كل شىء جاهز
وعندى خبرة فى الأشواق وشغلى زى ما انا عايز
راح أوزن كل أشواقى بحرص شديد وده مفهوم
وأخلطها بكل الحب واضيف ليها أمل محروم
على شوية منى وأحلام ولهفة قلب كان مهموم
وكل حنين لأيامك

وفرحة قلبى بفرامك

وأجمل ذكريات لينا على طول المدى بتدوم
واضيف لكل اخلاصى وأوزن واعرف المعلوم

واخلطهم .. وادويهم	بعطر الورد فى خدودك
واضيف كام نظره بعيونك	ولمحة من جمال عودك
واسيبهم جوه نار قلبى	يقاسوا نوعية المحروم
أسخنهم واجففهم	وآه من حرقه المهموم
وبعد شوية أعملهم	حبيب تاخديها طول اليوم
تلات مرات ومين قدك	طبيبك نفسه بيحبك
يا ريتنى كنت يا أملى	أخصائى ف علاج قلبك

سلامتك انت وعيونك	ويا تمنى سناكى يعود
سلامتك وانت فى أرضك	وانا فى غربتى مشدود
أحن كتير لأيامك	ويا شتاق للعيون السود
وحبك مهما حافى	فى قلبى للأبد موجود

عيد ميلادى

آه ياقلبى .. فين بلادى فين حبايى فى الميعاد
النهاردة عيد ميلادى واحنا تايهين فى البلاد
والغريب دايمًا وحيد كان على عينى البعاد
مين يقوللى عيد سعيد هو ده عيد الميلاد؟

عيد ميلادى جاى تانى والعيون فيها الدموع
والشموع تبكى معايا والألم بين الضلوع
وحدى بين الذكريات قد ايه محتاج اليها
وابتسم للأمنيات اللى مش قادر عليها
بعد ما كانت فى ايدى واللى ضيعها بعادى
والنهاردة عيد ميلادى جاى ليه يا عيد ميلادى؟
بعد ما ودع فؤادى فرحتى والأمنيات
بعد ما ودعت حبيبى وانطوى فى الذكريات
وابتديت أنسى الليالى اللى يبسموها عيد
واللى بيقولوا عليها كل شئ فيها جديد
والجديد فى يوم ميلادى وحدتى بين الشجون

الجديد فى عيد ميلادى غـريـتى ويا الظنون
الجديد قدام عينيه إن ما فى شىء جديد
كل احبابى النهاردة اللى فى قلبى .. بعيد
والغريب دايمًا وحيد حتى بين الناس وحيد
والحقيقة مهما أخبى إن قلبى مش سعيد

جرح ايام اغترابى ويا شوقى للبلاد
مش مخلينى النهارده افـتـكـر عـيد المـيلاد
كان معايا الوهم يومها فى صراع ويا الحنين
جاء ليه عيد الميلاد وانت يا قلبى حزين

مين يقوللى عيد سعيد غير أسايا والسهاد
عيد ميلادى جانى تانى واحنا تايهين فى البلاد
والسؤال دايمًا يا قلبى : هوده عيد الميلاد!

أنا مالى

أمرك عجيب يا زمن .. بترخص الغالى
ويهبون عزيز الأمل فى قلب أمثالى
طب بس ايه العمل .. ضيعت آمالى
أشكى لمين يا ترى .. مين الى ينصفنى
واللى سمع شكوتى .. بيقول وانا مالى

ملعونة كلمة وانا مالى بكل كتاب!
هى التى جابت لنا كل العذاب ع الباب
والناس بقت كلها عن بعضها أغراب
ما فى مودة ولا إثار ولا رحمة
غريبة .. كل البشر طلعت لها أنياب

فين حبنا لبعضنا وحق الجوار للجار
وشهامة ابن البلد فى ساعة الأخطار
ليه التواكل صبح .. مبدأ لنا وشعار
صاحبنا لو يشتكى .. نسبق بشكوتنا!
ونجيب له بعد الأسف مليون من الأعذار

ليه فى مكان العمل (عبد الروتين) قاعد
على فساد الذمم .. فى كل يوم شاهد
تعقيد أمور البشر راعع لها وساجد
كلمة ولسانه اتخلق علشان يرددها
(فوت بكره يا محترم) وكأنه بيعاند

لو ترحموا بعضكم .. يرحمكوا رب رحيم
واتوكلوا فى العمل يرزقكوا رب كريم
وتعيشوا فى مصرنا ما بين ترف ونعيم
واهم شىء تمنعوا كلمة (وانا مالى)
ونعيش حياتنا سوا يجمعنا حب عظيم

بنت باكستان

المتعة والفتنة في شعرك الفتان
وعيونك الحلوة السحر فيها كمان
واحترت انا بينهم يا بنت باكستان

الشرق وفنونه والليل وأسراره
والحب وجنونه والشقوق وأنواره
والفرحة واللهفة والهجر أو ناره
في عيونك الحلوة أشكال على ألوان
والصمت حيرني يا بنت باكستان

دائما على بالي فأكبر ومش ناسي
واحترت انا وقلبي من قلبك القياسي
لو تفهمي حبي أو نبيل إحساساسي
ما كنت ترضي لي في لحظة بالحرمان
أو تبعدني عني يا بنت باكستان

عندى حصان ابيض	طرفه جناحه ميل
حانطير أنا وانت	عليه لوادى النيل
فى مصر ابنى لك	بالحب عش جميل
حبك ويتداريه	بستارة الكتمان
ايه بس آخرتها	يا بنت باكستان

بالحب صارحتك	يا ريت تصارحينى
قالت حاقولك ايه	بعدك على عينى
ليه النهارده جيت	يا مصرى تغرينى
صارحتنى بحبك	فى بؤرة الحرمان
حبيت يا غالى ايه	فى بنت باكستان

مديت لها إيدى	وفتحت أحضانى
قلت لها حاتسافرى	ويايا أوطانى؟
قالت لى يا خسارة	زودت أشجبانى
ما عاد لى فى الغربة	بعد النهارده مكان
بكره أنا مسافرة	لكن .. لباكستان

عَبْدُ

عيونك كلها احساس وقلبي قد ايه حساس
لقيت السحر في عيونك بيتحدى عيون الناس
وانا حبك ملك قلبي
ومش قادر على حبي
كتمت الشوق ودا ذنبي
عيونك بحر ماله قرار وأخاف أغرق مع التيار
ياخذني الشوق يتوهني في كام موجه من الأسرار
وما في شط ما في حدود
وانا بسهم الهوى موعود
وكل اللي معايا وعود
عشقت الحسن في عيونك وانا فنان يا نور العين
ضربت القلب برموشك وانا انسان واروح على فين
باشوف احلامي في عيونك
واحبك حتى في جنونك
وغيرتك هي وطنونك
باحبك همسة مشتاقة ونسمة صيف لأيام

باحبك عطر ايامى واحبك طيف باحلامى

باحبك وانت فاهمانى

بحب عفيف وانسانى

داحبك نور لوجدانى

تغيبى عنى شىء ممكن بايدنا ايه قدر ونصيب

وحبك للأبد باقى محال شمس المحبة تغيب

عيونك بحر ماله حدود

واخاف اغرق وانا موعود

بحبى للعيون السود

راجع لـد بـبـى

عشان عاوز أنسى العذاب والأنين
وافتح لقلبى .. طريق الأمانى
عشان -حبنا اللى بطول السنين
راجع لك بحبى من الغربة تانى

هجرتك يا غالية وما كان لى حيلة
سراب كان واخذنى وراه كل ليله
وفتحت عينى .. لقيتتى ف مكانى
وانت على العهد باقية وأصيلة
شجونى لقيتها بحبك تهون
داويت بعطفك فؤادى الحزين
فتحت بهواك طريق الأمانى
واشعلت قلبى بنار الحنين
راجع لك بحبى

غرامى وغرامك ما يعرف حدود
وبالحب دايمًا بيحلى الوجود

حكايتنا غنوة وأيامنا حلوة
واصبحنا فى العشق لحن الخلود
يا عايشة فى قلبى بعادنا محال
هواك انكتب من زمان عالجبين
طريق الأمانى حايجمعنا تانى
راجع لك أعوض عذاب السنين
راجع لك بحبى

الإنسان

عيني على الإنسان
 في عالم الإنسان
 دائما مع المجتهدين
 يجري في كل مكان
 العمر عنده كتاب
 لكن بدون عنوان
 محروم ما يملك شيء
 كل اللي عنده لسان
 لكن خسارة يفوق
 بعد الأوان بزمان
 يلقي الستاره عليه
 ستارة النسيان
 والباقي بعدنا
 الحب .. يا إنسان

إننا حبيبين

انت حبيبتي .. حا افضل اقولها تانى وتانى
دايما انت .. احساس ممتع فى وجدانى
وانت انت .. أجمل بيت شعر ف ديوانى
قلبي معاكى بكل حنينى وكل حنانى

.....

اسمك انت أجمل كلمة نطقها لسانى
صوتك عندى أجمل لحن يقوله زمانى
وانت المعنى اللى العشاق قالوه فى أغانى
وانت راحتى ف غربة أعانى منها واعانى

.....

وانت واحة أمن ف صحرا وانت أمانى
وانت بسمه عمري وانت شبابى الثانى
وانت اجمل زهرة باشوفها فى بستانى
حبك يجرى ف دمي ويملى كل كيانى

.....

حتى عيونك كان سلطانها فوق سلطانى
كنت باحبك وانت باحساسك فاهمانى
وتحبينى وجوه ف قلبك شفت مكانى
كل منايا أعيش وياكى بكل حنانى
دانت حبيبتي وأجمل بيت شعر ف ديوانى

النار بتفضل نار

مين كان يصدق مين انى فى يوم أنساك
انا اللى شفتك يوم أيام ضلالى .. ملاك
من حبك الجبار

دلوقت بحر الندم ما يطفى نار الشجن
ازاى عرفتك انا ويقلبنى حبك سكن
والشوق صبح أشعار

انا اللى كنت ف يوم سباح فى بحر الهوى
صارعت فى الأمواج ولا عشت لحظة جوى
أو تهت فى الافكار

شفت ف عيونك ايه حبيتها بجنون ليه ؟
انت اللى قلبك صعب ما قدرت لحظة عليه
وفضلت انا محترار

باندم وكللى اسف عمر الندم ما يفيد
والجرح مهما تفوت أيامه .. جرح جديد
والنار بتفضل نار

فلا تنسنا

وراح اللى كان	خلاص اتنسنا
مما آن الآوان	ياريت يا ناسنا
ما هانت علينا	يا ريت الليالى
ما كنا اتنسنا	ياريت يا حبيبى

فريد فى الوجود	انا اللى غرامى
يفوق الحدود	وكان حب قلبى
نشيد الأمان	وكنت ف شفايفك
تشوف الحنان	تشوفنى عيونك
هنا ما جافينا	وليه النهارده
ما كنا اتنسنا	يا ريت يا حبيبى

أعيش لك بقلبي	عاهدتك بقلبي
واخلص فى حبيبى	أكون لك لوحده
واهم فى جمالك	واحبك بعمرى
بتشبه أمالك	وكانت آمالى
وعش يداريننا	فى دبلة وطرحه
ما كنا اتنسنا	يا ريت يا حبيبى

عُتَاب

بإبتسامة حلوة قالت والوجل باين عليها
قلبي كان حاسس بإنك لسه زعلان من يومها
والتقيتني بدون مقاومة لما بصت لى بعينها.!

لو عرفت الغيب يا حلوة وانكشف لى اللى كان
لو عرفت إن العتاب ده راح يكون مليون حنان
وان قلبك حايصافيني كنت حازعل من زمان

لكن أعمل ايه وقلبي عاش فى وسط الناس غريب
رقة الإحساس فى روى ضيعتلى .. شىء عجيب
رغم حبك عايز اقولك كل شىء قسمة ونصيب

طلب عفة

مقدرش اقول الزجل وابو الزجل موجود
ومدارى نفسى ورا بحر الخليل وباجود
وجدودنا قالوا نعم الجوده م الموجود
والميه ابيعها انا للسقاين ازاى ؟
لكن باحاول على قدى وده الموجود

يا ابو الزجل : للزجل عاشق انا زيك
قالوا النهارده ابتدا عهد الزجل عندك
يوم الأمل والمنى انى اكسون جنبك
انا جاى اقدم طلب عضوية تاخدونى
عندى البضاعه وانا مستنى .. ايه رايك

اسمى ؟ وايه فايدته .. واحد أنا من الناس
تاريخ ميلادى ؟ وليه تخرجنى يا حساس
عنوانى أو مهنتى دى حاجة مالها أساس
صورتى ورسم اشتراكى .. واستمارتكم
الى يهكم .. وانا شعله من الاحساس

إن كنت عايز زجل يا حلو اكتب لك
او كنت عايز اغانى حلوه ابعت لك
او كنت باصص إلى الموال.. أموّل لك
أو شعر عامى - يا عمى - برضه حاتلاقى
سبع صنايع أنا .. أأمر أجهزلك

إن كنت طالب غزل شعرى ولا المجنون
أو مدح من غير سبب فى المدح لى فنون
وعندى فخر وهجا وارثى بدمع هتون
وأعرف أفصل لكل مناسبة أبياتها
راجل صنايعى بقى مش عبقرى مجنون

واكتب فى شعر الحماسة تحفة للسامعين
واكتب بكل التقى والخوف كمان فى الدين
واعمل زجل انتخايبى ينفع الناخبين!
حتى الموشح وطار صيتى بكل مكان..
وبكره حاخذ .. بإذنه .. جايزة البابطين

البيت بسرعة اكتبه بس انت قوللى هات
بيتين ثلاثة أربعة آلاف من الأبيات
تلقاها ساعة زمن واقفه بكل ثبات
والأرض لو زلزلت .. أبياتى موزونه
بنا خبير .. خبرتى ترفع لها الزينات

فى اسكندرية الزجل كان اتولد واقف
له دوره فى المجتمع والشعب كان عارف
تأثير وسحر الزجل فى نفسنا هادف
دا شوقى نفسه نطق عن بيرم التونسي
وقال يا ناس ع اللغة منه أنا خايف

قولوا يا اهل الزجل ايه اللى ينفعنا
غير انضمامنا إلى جمعية ترفعنا
تمسك بإيدنا سوى نفلط تعلمنا
والنشر هو الأمل والحلم للشاعر
أو عن طريقها هنا الناس حاتعرفنا

قالوا الجماعة لها ميزة وليها حضور
والشعر لو نكتبه فيها يشوف النور..
دى مدرسه للأدب دورها عليه مشهور
والكلمة هى الحياة بالكاف معاه النون
والشاعر اللى انوعد ييجى عليه الدور

لكن شيطان الزجل ساعتها لما يعود
بيقول جماعة الأدب بتساعد المسعود
فى النشر والانتشار أما أنت مش موعود
رديت وقلت انها لو تتسى تنشر لى
تتشر لى أم الهنا وحبل الغسيل موجود

بنى الهام

حبيبتي ..

حياتي ..

فى يوم من حياتى جمعنا الطريق

وكان قلبى فى بحر حزنى غريق

قابلتك وشفيت الحنان الحقيقى

ومن يومها اصبح طريقك طريقى

وشفت فى عيونك

بدايتى ومصيرى

دا إنتى البراءة وانت العفاف

وعطر الأمانى وأعذب سلاف

وانتى اللى طول عمرها لؤلؤة

مكانك فى قلبى ما بين الشفاف

واصبحت من يوم ما شفتك ..

باخاف ..

باخاف م الليالى وآه م الليالى

فى ليلة بقسوة تضيع آمالى

ومن قلبك الطفل
خائف أخاف
لا يتخلى عني في ليلة جفاف
وأنا اللي بأحبك .. بأحبك .. بأحبك
وحولت شعري لفستان زفاف
ويسعدني ساعة ما أشوفك
جمالك
ونظرة عيونك وفتنة قوامك
وصوتك ودفء الهوى في كلامك
وحسيت بعطفك
وخوفك عليه
وايدك بتمسح دموعي في عينيه
غرقت ف همومي
ولكن حنانك ..
من الموج لقيته بياخذ ايديه
واقول ايه يا روحى
يا بلمسم جروحي
أقول انى شفت الجمال فى الصبايا

وشفتك لفتيك من الكل أجمل
أقول إن حبك وكان حلم عمرى
أصابنى بسهمه
وجانى فى مقتل
أقولك باحبك
ومن غير ما أقولك
دى كل الجوارح بتتطق بحبك
يا ريت بس اعرف مكانى فى قلبك
حبيبتى ..
حياتى ..
أشوقك .. أشوف مصر
فى عنيكى انتى
مفيش غيرك انتى
مفيش الا انتى
يا زهرة ..
يا بنت الهرم ..
يا حبيبتى

الفهرس

الموضوع	صفحة	الموضوع	صفحة
عيني عليك يا ولد	٥٣	تمهيد	٣
جرح الفؤاد	٥٦	مقدمة كامل حسنى	٤
أهل الأدب	٥٩	فى حب مصر	١٢
شهر النصر	٦١	رسالة من الغربة	١٦
على فين حاتروح	٦٢	عيد الحب	١٨
بكرة يا قلبى	٦٥	إعتراف	٢٠
مجرد حلم	٦٦	الاسكندرية مدينتى	٢٢
صلاح جاهين	٦٩	حضنك يا أمى	٢٥
صيدلية الحب	٧١	الكلمة حية	٢٧
عيد ميلادى	٧٤	حلم والا ايه	٢٩
وانا مالى	٧٦	شيطان الرحمة	٣٠
بنت باكستان	٧٨	أيام حبك	٣١
عيونك	٨٠	دنيا !.	٣٣
راجع لك بحبى	٨٢	أضيع من الأيتام	٣٤
الانسان	٨٤	مفיש فائدة	٣٦
انت حبيبتى	٨٥	لا للإرهاب	٤٠
النار بتلضل	٨٦	لسه فاكرك	٤٣
خلاص اتسبنا	٨٧	كلمة وهمسة	٤٥
عتاب	٨٨	دعاية انتخابية	٤٧
طلب عضوية	٨٩	صدفة	٤٩
بنت الهرم	٩٢	من يوم ما غاب	٥١

رقم الإيداع :

١٩٩٨/٧٦٦٠

مطابع جريدة السفير

٤٨٠٣٩٦٤ : ٣



شاعر الصيدلة

وصي دلى الشعراء

صلاح جاهين

دكتور / محمد شكرى على جاد

- بكاوريوس الصيدلة والكيمياء الصيدلية
- شاعر فصيح وعامية. نشرت قصائده بالصحف المصرية والعربية..
- وأذيعت من مختلف الإذاعات.
- عضو هيئة الفنون والآداب. وجمعية أدباء الشعب وجامعة الأدب العربي بالاسكندرية. ونادى الطائف الأدبي بالسعودية.
- قدمت له بالمسرح مسرحياته الشعرية (ويبقى الأمل) و(الكتاب).
- حاصل على الجوائز الأولى فى مسابقات شعر العامية والزجل :
- مسابقة جمعية كاريكاس الدولية لعام ١٩٩٢
- مسابقة وزارة الشؤون الاجتماعية ١٩٩٢
- هيئة تنظيم الأسرة لعام ١٩٩٢
- مسابقات جمعية أدباء الشعب للأعوام ١٩٩٣ - ١٩٩٤ - ١٩٩٦.
- مسابقة جماعة الأدب العربي لعام ١٩٩٢
- مسابقة جمعية الشبان المسلمين لعام ١٩٩٤
- مسابقة الفيصلية بالطائف لعام ١٩٩٥

تحت الطبع : ديوان شعر فصيح بعنوان (لن تعرفى مثلى)

عنوان الشاعر : ٢٨ ش الشهيد أم صابر. محرم بك. الاسكندرية

جمعية أدباء الشعب بالاسكندرية

716
35g



0607234